

Kontuola

ANTZUOLA / Egubakoitza / 2003ko uztailaren 4a / 164. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Gazteek Kalebarrengo lokala laga dute, batzarrean halaxe erabakita

AINZANE IRIZAR


Aurreko asteko egubakoitzean batzar orokorra egin zuten gazteek, Antzuolako Gazte Asanbladak deituta. Hantxe erabaki zuten Udalak emandako lokala lagatzea. Erabaki horren atzean Udalarekin gazteek izan dituzten desadostasunak daude.

Aste Santu aurretik eman zion Udalak Gazte Asanbladari lokala Kalebarrean. Orduetik hona hainbat egokitzapen lan egin dituzte lokal horretan, gaztetxea jartzeko. Orain dela gutxi KONTUOLAn bertan jakinarazi genizuen moduan, euren nahia zen lehenbailehen lan horiekin bukatu, eta herriko jaietarako gaztetxea zabaltzea.

Gauzak, baina, ez dira espero zuten bezala joan, eta azkenean, lokala lagatzea erabaki dute.

UDALAREKIN HAINBAT DESADOSTASUN

Esan bezala, lokala lagatzeko arrazoia izan da Udalarekin ez dutela adostasunik egin. Aurreko agintaldiko Udalarekin adostasuna lortuta zuten gazteek: "Ez zegoen idatzizko hitzarmenik, baina ahozko adostasunera



Aurreko asteko egubakoitzean laga zuten lokala gazteek.

iritsita geunden", adierazi digute. Orain, baina, gauzak aldatu egin ei dira; halaxe azaldu digute: "Azken baten, arazoa da Udalak ez duela gaztetxerik nahi, gazteleku bat edo gazte lokal bat bai zik". Gazte Asanbladako kideen

esanetan, autokudeaketaren gaian dute desadostasuna; gazteek nahi dute gaztetxea eurek kudeatzea.

Udala gertu dago gaztetxea aurrera ateratzeko diru bat jartzeko, baina, gazteen esanetan,

kasu horretan, Udalak berak kudeatuko luke lokala. Gazteek nahi dutena da Udalak bere jarra aldatzea eta adostasunera iristea. Dena dela, Gazte Asanbladak lanean segituko duela adierazi digute.



Martitzenean hasi ziren lanak

Azkenean, martitzen goizean hasi zituzten maristena izandako eraikina eraisteko lanak. Bi makinak dihardute lanean orduz gero. Aurreko astean dagoeneko Bergara alderako irteera itxi zuten, eta itxita segituko du lanek irauten duten bitartean. Udaleko arduradunen esanetan, gutxienez astebete iraungo dute lanek, baina litekeena da luzatzea.

Behin eraikina botata, gizarte etxea egiteko eraikin berria egiteko asmoa dute toki horretan./A.I.

LABUR

San Martzial jaiak ospatuko dituzte Lizarraga auzoan

Astelehenean, hilak 30, zen San Martzial eguna, eta hainbat ospakizun egin zituzten. Eta oraingo asteburuan ere hainbat ekitaldi egongo da: besteak beste, txokolate jana eta herri afaria egingo dituzte bihar, zapatua, eta domekan, berriz, meza eta erromeria izango ditugu.

Uztailaren 13an ospatuko dute erretiratuen eguna

11:30ean meza izango dute, eta Bergarako Erretiratuen Abesbatzak abestuko du. Eguerdian bazkaria egingo dute. Izena eman nahi dutenek hila-ren 5ean, 7an edo 8an erretiratuen egoitzara jo beharko dute, 18:00etatik 19:00etara. Hiru euro ordaindu beharko ditu bakoitzak.

Idolaz-ek batzar berezia egingo du eguenean, hilak 10

Idolaz euskara elkarteak batzar berezia egingo du datorren eguenean, hilak 10. Olatan etxean izango da batzar hori, 19:00etan. Azken urteotan kide berriak topatzeko eta gutxienez eginkizunei aurre egiteko izan dituzten arazoak ikusita, etorkizunean zer egin erabakiko dute batzarrean.

Martitzenean hasi zituzten herriko Udaleku Irekiak

Martitzenean hasi eta hila-ren 17ra arte Udaleku Irekiak izango dituzte goizero herriko umeek. 5 eta 12 urte arteko ia 90 ume hartuko dute parte Udala antolatutako udaleku horietan.

DBHko ikasleek, bestetik, ingelesa ikasteko eta praktikatzeko udalekuak hasi zituzten, martitzenean haiek ere.

IRAKURLIAREN TXOKUA

ALDUNDIARI ETA BERGARAKO
ETA ANTZUOLAKO UDALAI

Gipuzkoako Foru Aldundiari salaketa eta Bergarako eta Antzuolako Udalei gure keza helarazi nahi diegu.

Orain dela hilabete batzuk Bonbuluko etxea botatzeko asteak eta asteak behar izan zituzten eta orain, mendia mugitu delako, berriro ere itxi dute Bonbulutik San Antoniorako bidea. Hilabete baino gehiago pasatu da eta oraindik ez da inolako aurrerapenik ikusten.

Egoera hau guztiz salagarria iruditzen zaigu; izan ere, neglijentzia ez ezik, iruzurra ere badela iruditzen zaigu, eguna joan eta eguna etorri Antzuolako plazatik Bergarako autobus geltokiraino, joan-etorri bakoitzean 14,4 km egin behar izatea (6,6 km gehiago), berez, 7,8 km dituen ibilbidea egiteko, eta gastu hori, gainera, norbere poltsikotik ordaintzea. Bidea orain irekitzea eskatzen dugu.

GERTU GAE

OSOKO BILKURA

Hainbat eztabaida
sortu ziren bilkuran

AINTZANE IRIZAR

Aurreko asteko egunean egin zuten agintaldi berriko lehen-dabiziko ohiko osoko bilkura. Batzar hartan hainbat eztabaida sortu ziren Gertu Gaeko eta udalbatzarreko kideen artean. Agintaldi berriari begira hainbat erabaki hartu zituzten osoko bilkuran.


Udalbatza berria osatzeko osoko bilkura berezia egin zutenetik bi aste ere pasatu ez zirenean, aurreko egunean, ekainak 26, egin zuten agintaldi berriko lehendabiziko osoko bilkura.

Ekainaren 14ko bilkuran ez bezala, hainbat eztabaida sortu ziren, aurreko astean, Gertu Gae plataformako kideen eta alkate berriaren artean. Hauteskunde kanpainan eta ondoren iragarri bezala, osoko bilkuran parte hartera joan ziren Gertu Gaeko kideak, nahiz eta bilkuran hartutako erabakietan botorik ez izan. Plataformako kideok Udalean eta haren erabakietan parte hartzearen gainean eta parte-hartze hori zelakoa izan behar duenaren gainean sortu ziren, hain zuzen

ere, eztabaidak osoko bilkuran barrena.

Eztabaidak eztabaida, hainbat gairen gaineko erabakiak hartu zituen udalbatzak. Besteak beste, osoko bilkurak egiteko eguna aldatzea erabaki zuten. Hemen-dik aurrera hileko lehen egubakoitzean egingo dituzte osoko bilkurak, goizeko hamarretan. Dena dela, osoko bilkurako gaia garrantzitsua bada, eta Udaleko arduradunek hala erabakitzen badute, egunean egingo dute osoko bilkura, 19:00etan.

Bestalde, Gobernu batzordea eratzea erabaki zuten, eta gainerako batzorde informatzaileak zelan osatuko dituzten ere erabaki zuten: Ogasun eta Pertsonal batzordean Basili Ormazabal eta Elvira Kortajarena egongo dira; Hirigintza eta Zerbitzuen batzordean, berriz, Jose Ignacio Beltran eta Dina Muxika; Kultura, Euskara, Kirola, Gazteria eta Hezkuntzarenean, Iñigo Ramirez de Okariz; Osasun eta Ongizate batzordean, Dina Muxika eta Elvira Kortajarena; eta azkenik, Nekazaritza eta Ingurumen batzordean Dina Muxika zinegotziak jardungo du.



Kalebarren jai giroan murgildu zen

Egubakoitzean euria hasi zuenean, bazirudien eguraldiak ez zuela lagunduko. Azkenean, baina, uste baino eguraldi hobea egin zuen. Zapatuko Marrazki Lehiaketak arrakasta izugarria izan zuen; arbolaren bila ere sekula baino mutil gehiago joan ziren; gauean, berriz, herri afaria izan zen, eta Gurutzek denok jarri gintuen dantzan. Antolatzaileek zozketako zenbaki sarituak jakinarazi dizkigute: 165 zenbakia izan da saritua, eta uztailaren 15era arte dago aurkezteko epea. Sariduna azaltzen ez bada, 1.764 zenbakidun txartelari emango diote saria./A.I.

HERRITARREN HITZA / Gerbasio Legorburu · Txistularia

Antzuolako txistulariak

Lehen txistularixei buruz berba egitera noia. Nik hiru ezagutu ditut. Santiago Sologaitoa (Santi Montxon), Pedro Igarza (Pedro Xakuerre) eta honen semia, Eloy Igarza. Laugarrena, Pedro Telleria, 1936. urtian hil zan eta nik ez neban ezagutu.

Txistulari hauek domekero-garizuman izan ezik, bailabliak jotzen zittuzten herriko plazan, bostetatik zazpitterdiak aldera arte; udan edo neguan aldaketaren bat egiten zeben. Fandanguak, arin-arinak, biribilketak eta pasakailiak jotzen zittuzten. Ez zan beste soinurik izaten,

eta arrakasta haundixa lortzen zeben, neskatilen artian, batez be, gizonekorik eta mutilik ez zan-eta irtetzen plazara.

Bazuten beste eginkizun garrantzitsu bat ere: domeka goizetan, zortziretako mezaren ondoren pasakailia egiten zeben, plazatik atera eta Kalegoira, Lamaiñonekua esaten jakon pareraino. Hemen buelta hartuta, Ondarretik



“Alboradak oso gogoko izaten zittuzten txistularixek”

buelta arkupetaraino. Ondoren, zortzikua, fandangua eta arin-

behera Santiagoneko pareraino, eta handik plazara. Santikruzetan hasi (maiatzaren 3an) eta iraileko Santikruzak arte (irailak 14) egiten zittuen pasakaile horiek. Jaiegun haundittan, udal korporazioari udaletxetik elizara laguntzen zotsen, alkate-soinua joaz. Elizkizuna bukatutakoan, berriz

arina jotzen zittuzten; ez jat ahazten zelako zirrara sentitzen nuen doinu horiek entzutean. Dantzari taldeari ere laguntzen zotsen. Bukatzeko, auzoetako jaietan dantza soinuak jotzen zittuzten. Bazkalostian, berriz, baserriz baserri alborada esaten jakon doinuak jotzen zittuzten baserrietako atarixetan. Berdin egiten zeben kaleko auzo batzutan be. Txistularixek oso gogoko izaten zittuzten alboradak, nahiko kafe, pattar eta zigarro-puro hartzen zittuztelako, beti ere, eskupeko batzurrekin batera.

LABUR

Hiru antzuolar Iron Man lasterketan, Austrian

Julen Garitano, Karlos Baleztena eta Imanol Pildain antzuolarak Austrian daude dagoeneko; astelehenean abiatu ziren hara, eta etzi, domeka, Iron Man proban hartuko dute parte.

Austriako Kärnten herrian jokatu dute lasterketa hori, eta honako ibilbidea egin beharko dute: 2,2 kilometro igerian, 180 kilometro bizikletan eta, horren guztia- ren ondoren, maratoia: 42 kilometro korrika.

LARREA
TABERNA

Kalebarren 17
ANTZUOLA

ANTZUOLA

Apainketak eta
isolamenduak
Pladurrezko dibisioak

Kalegoi 21 ANTZUOLA
676 997 400
Biltegia: 943 78 70 40

Tomas Gezalaga

Apainketarako eta
industriarako pinturak
Paper margotuak
Moketak eta tapizatuak

Kalegoi 21
Tf. eta faxa 943 76 64 07
Poltsikokoa 616 277 999
ANTZUOLA / BERGARA

GAILUR
taberna eta
gozotegia

Buztinzuri 13 ANTZUOLA
Tf. 943 78 70 32

Tomas Gezalaga

Zoruen kutxilatuta
eta
barnizaketa

Kalegoi 21
Tf. eta faxa 943 76 64 07
Poltsikokoa 616 277 999
ANTZUOLA / BERGARA